

Cussagl da cumün

Protocol nr. 13 da ls sezzüda dals 15 settember 2009

Pumpiers, veicul

Per pudair garantir la sgürezza dals pumpiers e da la populaziun faja dabsögn d'ün veicul pels apparats da respiraziun. La suprastanza dals pumpiers Pisoc fa la dumonda per s'acquistar il veicul l'on 2011. La part per nos cumün (13.1 %) importa fr. 12'500.-- e vain pajada in duos ratas annualas da fr. 6'250.--. Il Cussagl decida da preverer quist import i'l preventiv dals prossems duos ons.

Chesa da giarsuns d'Engiadin'Ota, sanaziun s-chodamaint e condots

Ils condots d'aua e'l s-chodamaint da la chasa da giarsuns a Samedan sun in ün nosch stadi ed han da gnir sanats. Il plan da finanziaziun prevezza cha'ls cumüns da domicil dals giarsuns surpiglian ün import da fr. 200'000.--, ils cumüns da l'Engiadin'Ota ün import da fr. 200'000.-- e privats ün tal da fr. 50'000.--. Tenor la clav da scumpart ha nos cumün da surtour ün import da fr. 3'433.--. Il Cussagl sustegna il proget e decida dad arrun-dir l'import sün fr. 4'000.--.

Jeunesses Musicales Thurgau

Dals 3 fin als 10 october ha lö ün chomp da musica da la "Jeunesses Musicales Thurgau" a l'Institut otalpin. Els fan quai fingià daspö l'on 1997 e dumondan quist on per la prüma jada ün sustegn finanziel. Il Cussagl es persvas chi's tratta d'ün inrichimaint cultural pel cumün e per tuot la regiun e decida perquai da contribuir ün import da fr. 2'000.--.

Lai da Padnal

Il Cussagl deliberescha ün credit da fr. 2'500.-- per üna visualisaziun dal proget Lai da Padnal. Quella pussibiltescha al cumün da preschantar il proget plü detaglià a la populaziun ed als donatuors privats. Dürant l'on chi vain decida la radunanza sur dal proget, tant cha la realisaziun dal lai vain büdschetada pel 2011.

Plazzas da parcar cun ün dret d'adöver

Tenor ils contrats per l'adöver da las plazzas da parcar in chascha il cumün üna taxa per la ruotta. Tala importa fr. 40.-- per piazza ed on. Il Cussagl es da l'avis cha quella dess esser integrada in l'indemnisaziun unica per la piazza e decida perquai da tilla s-chassar a partir dals 1. schner 2010.

Fossa cumünaivla

Il uorden da sunteri prevezza üna fossa cumünaivla per urnas. Per ingon esa büdschetà ün import per la realisaziun da quella. La cusgliera respunsabla pel sunteri ha laschà offrir la lavur. In basa a quella decida il Cussagl da surdar la lavur a sar Erich Zobrist da Zernez per l'import da fr. 13'350.--.

Restructuraziun Plaz

La radunanza ha refüsà il proget per la restructuraziun da la parcella nr. 233 in Plaz e giavüschà al Cussagl da preschantar quel insembel cul concept da parkegi da tuot il cumün. Il Cussagl integrescha la fuormaziun da la parcella nr. 233 illa discussiun cun sar Peter Hartman dal büro d'indschegner da trafic Hartmann & Sauter da Cuoi-ra.

S-chabellera Ftan - Prui, proget

Davo cha las Penderas han decis da sbassar la staziun da muntogna in Prui per 2 m. nun ha il Cussagl ingünas remarchas invers il proget da publicaziun da la s-chabellera nouva chi vain fabrichada l'on chi vain.

Posta Ftan, agentura

Il Cussagl s'ha ingaschè per chi gnian evaluats plüs lös per l'agentura da la posta. Davopro s'ha interessada eir la "ENGADIN Scuol Tourismus AG (ESTAG) per quist'incumbenza ed integrar l'agentura in lur localitats da la Ftan Turissem. Quella ha persvas il plü ferm, tant cha'l Cussagl sustegna la proposta da l'agentura illas localitats da la Ftan Turissem. El es persvas chi's tratta d'üna soluziun optimala ingio cha tuottas duos parts pon profitar.

Vonlanthen Stefan e Schulze Rudi, paraid da lain

Il capo e'l schef da fabrica han gnü üna discussiun culs duos signuors Stefan Vonlanthen e Rudi Schulze. Els giavüschan cha'l termin per tour davent la paraid da lain tanter lur parcelas 2732 e 2725 gnia prolungà per ün on voul dir fin la fin d'october 2010, quai chi'd es eir gnü concess.

Saivs da la meglioraziun

Il Cussagl decida da scriver a la società da meglioraziun e da render attent cha las saivs da lain hajan da gnir mantgnüdas. In plüs lös sun quellas in ün pac bun stadi.

il capo: sig. Reto Pedotti

l'actuar: sig. Andri Florineth

publichà als 22/09/2009